

Na osnovu člana IV. 4.a) Ustava Bosne i Hercegovine, Parlamentarna skupština Bosne i Hercegovine, na 20. sjednici Predstavničkog doma, održanoj 2. februara 2012. godine, i na 13. sjednici Doma naroda, održanoj 29. februara 2012. godine, usvojila je

## **ZAKON O IZMJENAMA I DOPUNAMA ZAKONA O LIČNOJ KARTI DRŽAVLJANA BOSNE I HERCEGOVINE**

### Član 1.

U Zakonu o ličnoj karti državljana Bosne i Hercegovine ("Službeni glasnik BiH", br. 32/01, 16/02, 32/07, 53/07 i 56/08) član 2. mijenja se i glasi:

### "Član 2.

Lična karta je javna isprava kojom se dokazuje identitet, činjenica mjesta i datuma rođenja, prebivališta, odnosno boravišta za raseljeno lice i državljanstva BiH.

Državljeni BiH mogu koristiti ličnu kartu za prelazak državne granice u određenim okolnostima i pod uslovima utvrđenim međunarodnim sporazumom BiH s drugim državama.

Ličnu kartu s kvalificiranom potvrdom državljeni BiH mogu koristiti i za obavljanje elektronskih usluga.

Lična karta, u skladu sa Zakonom, služi i kao dokaz o drugim činjenicama koje su u njoj sadržane.

Potvrda ili privremena lična karta izdata prilikom oduzimanja lične karte na osnovu ovog zakona ili Zakona o krivičnom postupku u svim slučajevima i u sve svrhe zamjenjuje ličnu kartu i bit će prihvaćena od svih kao lična karta, osim za prelazak državne granice. Potvrda i privremena lična karta izdaje se bez naknade."

### Član 2.

U članu 3. iza stava 6. dodaje se novi stav 7. koji glasi:

"Od državljanina BiH može se tražiti kopija lične karte, samo u postupku revizije ili prestanka državljanstva BiH i kada je to zakonom propisano."

### Član 3.

U članu 4. riječi: "Zakonom o zaštiti ličnih podataka BiH i Zakonom o centralnoj evidenciji i razmjeni podataka" zamjenjuju se riječima: "Zakonom o zaštiti ličnih podataka ("Službeni glasnik BiH", broj 49/06) i Zakonom o Agenciji za identifikacione dokumente, evidenciju i razmjenu podataka Bosne i Hercegovine ("Službeni glasnik BiH", broj 56/08), (u daljnjem tekstu: Zakon o Agenciji)."

### Član 4.

Član 6. mijenja se i glasi:

### "Član 6.

Podaci o državljaninu Bosne i Hercegovine koji se evidentiraju prilikom podnošenja zahtjeva za ličnu kartu su:

1. ime,
2. prezime,
3. datum rođenja,

4. mjesto rođenja,
5. općina prebivališta ili boravišta za raseljeno lice,
6. spol,
7. jedinstveni matični broj (u daljnjem tekstu: JMB),
8. fotografija,
9. potpis,
- 1 otisci prstiju,
- 0.
- 1 državljanstvo BiH.
- 1.

Osim podataka iz stava 1. ovog člana, u ličnu kartu upisuju se: serijski broj, datum izdavanja-datum unošenja podataka u ličnu kartu, rok važenja, podaci koji se mogu očitati kompjuterski, te naziv nadležnog organa koji je izdao ličnu kartu. Na zahtjev državljanina, u ličnu kartu unosi se podatak o krvnoj grupi utvrđen nalazom ovlaštene zdravstvene ustanove. Na zahtjev podnosioca zahtjeva za izdavanje lične karte ili kadaje to neophodno za provođenje Izbornog zakona Bosne i Hercegovine, u ličnu kartu unosi se podatak o entitetskom državljanstvu.

Državljanin mora navesti svoj poštanski broj i adresu. Ova informacija ne pojavljuje se u ličnoj karti.

Naslov i nazivi pojedinih polja u ličnoj karti pišu se na bosanskom, hrvatskom, srpskom i engleskom jeziku. Podaci se upisuju latiničnim i ćiriličnim pismom odvojeno kosom crtom (/). U ličnu kartu se u standardima predviđenom dijelu unose kompjuterski i mašinski čitljivi podaci prebačeni u slova engleskog alfabeta kako je to definirano propisanim standardima. Ukoliko su u matičnim knjigama na osnovu kojih se upisuju podaci u evidencije lične karte upisana posebna slova koja nisu definirana zvaničnim jezicima i pismima u Bosni i Hercegovini, onda se ova slova prebacuju shodno međunarodnim standardima, a prema Uputstvu koje donosi direktor Agencije za identifikacione dokumente, evidenciju i razmjenu podataka Bosne i Hercegovine (u daljnjem tekstu: Agencija).

Obrazac lične karte sadrži elektronski memorijski element. Na elektronski memorijski element u procesu personalizacije pohranjuju se i kriptografski štite podaci iz st. 1. i 2. ovog člana, kao i oznaka za vrstu isprave kako bi se isprava mogla koristiti za putovanje van Bosne i Hercegovine, oznaka države, kao i drugi podaci u skladu sa standardima. Ako nije moguće izvršiti elektronsko preuzimanje otisaka prstiju od građana, onda se u memorijski element upisuje oznaka da otisci prsta nisu preuzeti, kao i ime službenika nadležnog organa koji je preuzimao otiske prstiju i organ koji je izdao navedenu ličnu kartu. O načinu unosa podataka na elektronski memorijski element posebno uputstvo donosi direktor Agencije.

Državljaninu BiH može se na zahtjev izdati lična karta koja sadrži kvalificiranu potvrdu Agencije kao nadležnog ovjerioca. U kvalificiranoj potvrdi nalaze se podaci propisani Zakonom o elektronskom potpisu BiH ("Službeni glasnik BiH", broj 91/06) i propisima donesenim na osnovu tog zakona.

Nadležni organi, definirani u članu 7. ovog zakona, dostavljaju elektronskim putem naloge za upis podataka u obrazac lične karte Agenciji. Agencija upisuje podatke u obrazac lične karte i uspostavlja skladište obrazaca ličnih karata na jednom mjestu u BiH.

Agencija donosi podzakonske akte da bi se osigurala odgovarajuća zaštita tih podataka, u skladu sa Zakonom o zaštiti ličnih podataka BiH i Zakonom o Agenciji".

#### Član 5.

U članu 8. stav 3. mijenja se i glasi:

"Lična karta može se preuzeti lično, preko opunomoćenika ili poštanskim putem. Način preuzimanja izabrat će državljanin prilikom podnošenja zahtjeva za izdavanje lične karte".

Iza stava 3. dodaje se novi stav 4. koji glasi:

"Smatra se daje dostavljanje poštom iz prethodnog stava ovog člana obavljeno kada državljanin ili drugo ovlašteno lice preuzme ličnu kartu. Ako se lična karta ne preuzme u propisanom roku, ona se vraća nadležnom organu i može se naknadno preuzeti kod organa koji je izdao ličnu kartu".

Član 6.

Član 12. mijenja se i glasi:

"Član 12.

Za izdavanje i zamjenu lične karte ne plaća se taksa".

Član 7.

U članu 20. iza stava 1. dodaje se novi stav 2. koji glasi:

"Podaci o serijskim brojevima izgubljenih i ukradenih ličnih karata mogu se objaviti na veb-stranici Agencije, o čemu Agencija donosi uputstvo."

Dosadašnji st. 2. i 3. postaju st. 3. i 4.

Član 8.

U članu 22. stav 1. riječi: "zakonom kojim se regulira oblast centralne evidencije i razmjene podataka na nivou BiH" zamjenjuju se riječima: "Zakonom o Agenciji".

Član 9.

U članu 23. iza stava 1. dodaju se novi st. 2. i 3. koji glase:

"Državljanin BiH može podnijeti zahtjev za izdavanje uvjerenja o činjenicama iz evidencija elektronskim putem preko portala nadležnih organa iz člana 7. ovog zakona sa sigurnim elektronskim potpisom ovjerenim kvalificiranom potvrdom, a u skladu s Uputstvom koje donosi Agencija, a nadležni organ traženo uvjerenje može dostaviti elektronskim ili pismenim putem kako to stranka u svom zahtjevu navede.

Nadležni organ će rješenjem odbiti zahtjev za izdavanje uvjerenja, ako utvrdi da elektronski potpis nije u skladu sa zakonskim uslovima."

Član 10.

U članu 24. u prvoj rečenici riječi: "organu koji vodi centralnu evidenciju na nivou BiH" zamjenjuju se riječima: "Agenciji". U drugoj rečenici riječi: "Organ koji vodi centralnu evidenciju" zamjenjuju se riječima "Agencija".

Član 11.

U članu 27. riječi: "Zakonom o centralnoj evidenciji i razmjeni podataka" zamjenjuju se riječima: "Zakonom o Agenciji"

Član 12.

U članu 40. stavu 2. tačka c) briše se.

Dosadašnje tačke d) i e) postaju tačke c) i d).

U stavu 3. riječi: "organ koji vodi centralnu evidenciju" zamjenjuje se riječima "Agencija".

U stavu 3. iza tačke d) dodaje se nova tačka e) koja glasi:

"e) provođenju čl. 6. stav 4., 20. stav 2. i 23. stav 1. tačka b) osnovnog teksta zakona.

Iza stava 3. dodaje se novi stav 4. koji glasi:

"U roku od 90 dana od dana stupanja na snagu ovog zakona, Vijeće ministara Bosne i Hercegovine, na prijedlog Agencije, donosi propis o cijeni lične karte."

Član 13.

Ovaj zakon stupa na snagu osmog dana od dana objavljivanja u "Službenom glasniku BiH".

Predsjedavajući	Predsjedavajući
Predstavničkog doma	Doma naroda
Parlamentarne skupštine BiH	Parlamentarne skupštine BiH
Dr. <b>Milorad Živković</b> , s. r.	Dr. <b>Dragan Čović</b> , s. r.